

乾道臨安志
附札記



叢書集成

初編

王雲五
編者

商務印書館發行



乾 鐘 臨 安 志

雜 記

廣 州 廣
州 鐘 鐘 鐘

本館叢書集成初編所選
粵雅堂叢書及式訓堂叢
書皆收有此書式訓本據
錢警石校本校刊又有錢
保塘札記附後自較粵雅
本爲優故據式訓本排印

直齋書錄解題。臨安志十五卷。府帥周滄彥廣撰。首卷爲行在所。於宮闕殿閣。全不記載。藉曰禁省嚴祕。不敢明著。其視宋次道東京記。何其大不侔。其他沿革。亦多疏略。然滄有才具。其尹京。開湖濬河。皆有成績。今城中河道通利。民戶爲腳船。以濟行旅者。蓋自此始。

四庫全書總目。乾道臨安志三卷。宋周滄撰。滄字彥廣。湖州長興人。乾道五年。以右文殿修撰。知臨安府。創爲此志。原本凡十五卷。見宋史藝文志。其後淳祐開施鑄。咸淳間潛說友。歷事編纂。皆有成書。今惟潛志尙存鈔帙。周施二志。世已無傳。此本爲杭州孫仰曾家所藏。宋槧本。卷首但題作臨安志。而中間稱高宗爲光堯。太上皇帝。稱孝宗爲今上。紀牧守至滄而止。其爲乾道志無疑。惟自第四卷以下。俱已闕佚。所存者僅十之一二。爲可惜耳。第一卷紀宮闕官署。題曰行在所。以別於郡志。體例最善。後潛志實遵用之。二卷分沿革。星野。風俗。州境。城社。戶口。廨舍。學校。科舉。軍營。坊市。界分。橋梁。物產。土貢。稅賦。倉場。館驛等。諸子目。而以亭臺樓觀閣軒附其後。敘錄簡括。深有體要。三卷紀自吳至宋。乾道中諸牧守。詳略皆極得宜。滄尹京時。撩湖濬渠。頗留心於地利。故所著述。亦具有條理。今其書雖殘闕不完。而於南宋地志中。爲最古之本。考武林掌故者。要必以是書稱首焉。

長興周滄彥廣撰臨安志十五卷。直齋書錄解題其首卷爲行在所。於宮闕殿閣。全不記載。其他沿革。亦多疎略。此書世所罕傳。萬歷中。吾郡陳布政善修府志時。已不得見。孫君晴厓得宋槧本於京師故家。祇一

卷至三卷。所載園亭坊巷及職官姓氏。爲潛君高成瀆志蓋本。其他惜無從更覓。然斷珪殘璧。爲此邦文獻計。已不啻寶如圖球。志稱乾道三年五月二十六日。以右朝請大夫直龍圖閣兩浙轉運副使知臨安府。先是紹興五年嘗通判府事。宋史本傳但言宣和間。以父任爲郎。歷官至通判。建康府志稱乾道四年十月十四日。磨勘轉右朝議大夫。五年七月初四日除右文殿修撰。再任。本傳但言進右文殿修撰。提舉江州太平興國宮以歸。無再任臨安事。此可以補史之闕。成瀆志載淙瀆湖撩草諸善政。孝宗手敕獎諭。本傳但言其開河一事。亦似過略。董浦杭世駿跋。

乾道臨安志十五卷。宋臨安府尹吳興周淙彥廣所修也。此宋槧本僅一卷。至三卷無序目可稽。觀其稱孝宗爲今上。紀職官至淙而訖。其爲乾道志無疑。吾郡志乘之有名者。北宋圖經久已無攷。至南渡建爲行都。則此志居首。繼之以施愕瀆祐志。潛說友咸瀆志。皆爲宋人排綴。予所見者。祇有成瀆志百卷。向在花山馬氏。吳君尺鳧鈔藏尙缺七卷。趙君谷林復購得宋槧本之半。固以珍如球璧。今孫君晴厓從都下獲此志。雖僅十之一二。當時宮闕官署。城中橋梁坊巷具存。職官始末。更爲詳晰。諸家儲藏著錄。未有及此者。淙尹京時。撩湖瀆渠。綽有政績。載在宋史。其書更可寶也。亟錄副本而歸之。樊榭厲鶚跋。

吳壽暘拜經樓藏書題跋記。乾道志鈔本止三卷。每葉二十行。行十九字。先君子以錢氏萃古齋新鈔本

校錢氏本。每葉十八行。行二十字。

吳壽暘爲海甯吳
苑林明經孫子。

周淙彥廣乾道臨安志十五卷。今僅存三卷。四庫所錄卽杭州孫仰曾家藏本也。道光戊戌三月海昌蔣生光煦以舊鈔本見贈。六月初旬假蔣生所藏陸香圃三間草堂鈔本及吳氏拜經樓鈔藏本。謹校一過。拜經藏本與此大略相同。三間草堂本似稍勝。疏其異同以俟裁定。海甯州學訓導錢泰吉謹校上。此

上桐城姚伯昂總志見

所著處書雜記卷中

乾道臨安志卷第一

宋 吳興周 淳彥廣撰

行在所

宮闕四用

大內在鳳凰山之東，以臨安府舊治子城增築，南曰麗正門，門外建東西兩廡，北曰和寧門，門外建百東曰東華

門，建興中，車駕南遷，駐蹕於此，紹興七年二月，降詔遷幸建康府，紹興八月三月，移蹕臨安府，下詔曰，昔

在光武之興，據定都於洛，而車駕往反，見於前史者，一用當奮揚英武，邁行天討，上繼隆漢，朕甚慕之，

朕有祖宗之休，克紹大統，夙夜危懼，不常厥居，比者過幸建康，撫綏備旬，既已申國遺聞，獎率六軍，是故

復還臨安，內修政事，繕治甲兵，以定基業，非厭靈露之苦，而圖宮室之安也，故茲詔諭，想宜知悉。

德壽宮在保仙橋之東，宮門外有百官待殿紹興三十二年六月四日，奉聖旨以德壽宮爲名，是月十一日，光堯壽

聖太上皇帝降詔，退處是宮，其日，今上皇帝登寶位。

皇太子府

慶王府

恭王府。

右在德壽宮北。

宗廟 櫛宮附。

太廟在瑞石山之左。

景靈宮在新莊橋之西。崇禎館道院
在宮之南。

安穆安恭皇后櫛宮在錢湖門外三里修吉寺。

莊文太子櫛所在錢湖門外二里寶林院。

郊社

圜壇在嘉會門外以南四里三歲一郊天。

熙成殿 在壇側。

太社太稷壇在觀橋東北每歲春秋祀社稷。

九宮壇在東青門外一里歲祀九宮貴神。

藉田在先農壇嘉會門外以南四里玉津園之南紹興十五年十一月十七日詔以來歲之春祇祓青壇。

親載耒耜躬三推之禮。以風示於四方。明年孟春二十有二日。太上躬耕藉田禮成。自後歲祀先農於此。高祿壇在嘉會門外以南四里龍華寺。歲祀高祿。

三省

尙書省。六部。

中書省。後省。

門下省。

樞密院。承旨司。

以上在和甯門外之北。

臺閣

龍圖、天章、寶文、顯謨、徽猷、敷文閣在和甯門裏。

御史臺在清和坊之西。

祕書省在天井巷之東。

光堯太上皇帝御書右文殿曰。右文之殿。門曰右文殿門。

寶錄院。

日歷所。

右附於祕書省。

學校

太學。紹興十二年四月三十一日奉聖旨。太學養士。權於臨安府學措置。增展其格法。令禮部討論。繼而於前洋街建立。十四年三月己巳。光堯太上皇帝祇謁先聖。止輦於大成殿門外。降登步趨。執爵奠拜。注視貌象。翼翼欽慕。復幸太學。御敦化堂。頒手詔。示樂育詳延之誠意。命國子司業高閔講周易泰卦。賜羣臣諸生坐。垂聽講說。首肯者再三。復迂玉趾。俯臨養正。持志二齋。顧瞻生徒肄業之所。徘徊久之。始命駕言還。乾道五年。奉聖旨。令兩浙轉運司臨安府重修殿宇。

光堯太上皇帝御書至聖文宣王廟曰。大成之殿。門曰大成殿門。

光堯太上皇帝御書御書閣牌曰。首善之閣。藏光堯太上皇帝御書石經。

敦化堂。

米友仁被旨書。

齋舍

服膺。	親身。	守約。	習是。	養正。	存心。	節性。	持志。	率履。	誠意。
經德。	允照。	循理。	時中。	愜信。	果行。	務本。	貫通。	觀化。	立禮。

武學在前洋街。紹興十六年四月初二日奉聖旨。令兵部討論武士弓馬及試選去留格法。申尙書省。二十六年奉聖旨。令禮兵部檢會祖宗以來武學養士典故施行。乾道五年奉聖旨。令兩浙轉運司臨安府

重修殿宇。

昭烈武成王殿。

敦閱堂。

齋舍

受成。

貴謀。

輔文。

中吉。

經遠。

閱禮。

諸王宮大小學在睦親宮之右。

貢院在觀橋之西。

別試所在貢院之側。

經筵

講筵所。

資善堂。

講筵閣。

以上並在禁中。

宮觀

太一宮在新莊橋之南。

崇真館道院在宮之南。

萬壽觀在新莊橋之西。

晨華館道院
在觀之東。

四聖延祥觀在孤山。紹興十六年建。二十年賜今額。

道院在
觀之北。

三茅甯壽觀在城中七寶山。紹興十六年賜今額。

顯應觀紹興十九年於龍山西建立。二十四年徙於湧金門外靈芝寺之右。

旌忠觀紹興元年宣撫處置使張浚劄子據吳玠陳請陝西出兵自來祈禱三聖屢獲顯應乞於鳳翔寺和尚原立廟賜旌忠廟額封忠烈靈應王忠顯昭應王忠惠順應王三年張浚楊存中郭仲荀用已俸於臨安府踏道橋東立廟紹興十九年改賜觀額三十二年徙於覺苑寺故基。

廟宇

祚德廟在車橋西紹興二十二年二月二十一日奉聖旨令兩浙轉運司蓋造。

苑囿

玉津園在龍山之北。

聚景園在清波門外。

院

諫院在三省後

學士院在和甯門裏

登聞檢院在麗正門外

登聞鼓院在麗正門外

官告院在尙書吏部中門

都進奏院在朝天門外

諸司糧料院在壽域坊之北

諸軍糧料院在壽域坊之北

文思院上下界在北橋之東

車輅院在嘉會門外

騏驎院在紫坊嶺下

六房院在三橋之西

五房院在紅橋之西

所

玉牒所，在朝天門之南。

勅令所，舊在天井巷，今徙於朝天門之南。
軍器所，在祥符寺之東。

三衙

殿前司，在八盤嶺南。

侍衛馬軍司，在天慶坊。

侍衛步軍司，在鐵冶嶺。

寺監

太常寺，在天井巷。舊勅令所。

宗正寺。附於大
宗正司。

大理寺，在仁和縣西。

司農寺，在市南坊之北。

大府寺，在通江橋之東。

國子監事具學校
將作監在修文坊。
軍器監在修文坊。

司

大宗正司在睦親坊。

軍頭引見司在文思院後。

左右金吾衛仗司在吳山。

諸司審計司在淨因坊之北。

諸軍審計司在淨因坊之北。

牛羊司在權貨務後。

排岸司在武學相對。

內諸司

閣門。

客省四方館。

右在和甯門外

入內侍省。

禁衛所。

皇城司。

御藥院。

御輦院。

御前馬院。

內東門司。

翰林院。

天文局醫官局
鐘鼓院隸焉。

修內司。

御廚。

通進司。

儀鸞司。

翰林司。

後苑。

合同憑由司。

內軍器庫。

內藏庫。

御酒庫。

右並在禁中。

倉

省倉上界在天水院橋之北。

中界在仁和縣橋之東。

下界在餘杭門外九里。

豐儲倉在東青門外三里。

場

權貨務都茶場在通江橋之東。

雜買務雜賣場在通江橋之西。

草料場在天水院橋之北。

糯米糴場在德勝橋之北。

庫

左藏庫在清湖橋之西。

御酒麴料庫在後市街。

祇候法物庫在糯米倉巷。

度牒庫在油車巷。

瞻軍南酒庫在朝天門外。

有和樂樓。

東酒庫在柴塚橋之東。有大和樓。

北酒庫在鹽橋之東。

西酒庫在三橋之西。有豐樂樓。

中酒庫在瀾頭市之西。

南外酒庫在候潮門外。

北外酒庫在江漲橋鎮。

局

太醫局在葛公橋之南。

和劑局在臨安府治後。

太平惠民南局在太廟之南。

太平惠民北局在瀾頭市。

太平惠民西局在衆安橋。

太平惠民東局在浙江。

太史局在吳山。

編估打套局在太府寺後。

府第

左右僕射府在壽域坊南。

樞密知院府在天慶坊。

執政府在天慶坊。

嗣濮王府在軍將橋之東。

吳王府在後洋街。

益王府在中沙巷。

睦親坊在清湖橋之東。

臺諫宅在太常寺西。

百官宅在石灰橋。

館驛

都亭驛在候潮門裏。國信所附之。

懷遠驛。舊在法慧寺。今廢。

班荆館。在赤岸港。

軍營

禁衛諸班直營。

一在天慶坊。一在保民坊。一在崇新門裏。一在長山門裏。

皇城司親從親事等指揮營。在豐樂橋東。

捧日、天武、龍神衛等指揮寨。并殿前司馬步軍三司諸軍寨。並環列於府城內外。東至外沙。西至西溪安

樂山。南至龍山。北抵江漲橋鎮。

御輦院供御次供御下都輦官營。在崇新門裏。

儀鸞司營。

一在保安門裏。一在麗正門外。

翰林司營。在鹽橋南。

御廚營。

一在天慶坊。一在報恩寺。

修內司壯役等指揮。在萬松嶺下。

軍器所萬全東西作坊等指揮營在大理寺西。
軍頭司等子營在文思院後。
馴驢院教駿營在紫坊嶺下。

乾道臨安志卷第二

歷代沿革

大都督臨安府餘杭郡甯海軍節度

治錢塘仁和二縣

禹貢揚州之域。春秋時，屬吳。吳滅，入越。越滅，入楚。秦并天下，

屬會稽郡。

太平寰宇記：夏禹東去，捨舟航登陸於此，乃名餘杭。吳越春秋：夫差二十三年，止於餘杭山。史記：始皇三十七年十一月，過丹陽，至錢塘，臨浙江西一百二十里，從狹中渡，顧夷曰：始皇過餘杭，因爲縣焉。

漢因之。

四漢地理志有餘杭

錢塘富春縣，又海鹽縣武原鄉有鹽官。沈約宋書曰：鹽官，漢舊縣也。

至東漢順帝之後，隸吳郡。

東漢地理志：吳郡有餘杭，富春城，丹陽郡有於潛城。

三國時，屬吳。吳大帝分餘杭置

臨水縣。

吳志：賀齊表奏分餘杭爲臨水縣。

黃武五年，卽富春縣置東安郡。

吳志云：分三郡十縣地置東安郡，以全琮爲守。

又分富春置新城縣，旣而廢。

寶鼎二年

割於潛屬吳興郡。

晉太康元年，改臨水縣爲臨安縣。時鹽官、錢唐、富陽

晉武帝避同文郡太后諱，改春曰陽。

隸吳郡。臨安、餘杭於潛隸吳

興郡。

事見晉地理志

咸和中，復置新城縣。宋、齊、梁因之。陳置錢塘郡，隋開皇九年平陳廢郡，割吳興、吳郡之地置

杭州。初治餘杭，未幾移治錢塘。省并新城臨安縣。仁壽二年，割武康縣屬杭州。因置總管府。大業初，改爲

餘杭郡，統縣六。

隋地理志云：錢塘、富陽、餘杭於潛、鹽官、武康。

唐武德六年六月，復爲杭州，隸蘇州總管。是年沒於輔公祏。七年平賊。

復置杭州。因并鹽官入錢塘。以武康隸湖州。隍於潛縣爲潛州。八年州廢。以舊縣來屬。貞觀元年。分天下爲十道。杭州隸江南東道。四年分錢塘復置鹽官。凡領縣五。錢塘富陽餘杭於潛鹽官隸潤州都督府。永淳元年析富陽

復新城縣。垂拱二年析於潛置紫溪縣。四年析餘杭復臨安縣。萬歲通天元年改紫溪爲武隆。聖歷元年

又改爲武崇。神龍元年改爲唐山。今昌化縣也。大歷二年廢長慶之後復置。景雲二年屬江南道按察使。開元二十一年分隸江南

東道採訪使。天寶元年改爲餘杭郡。統縣八。唐志云錢塘富陽餘杭於潛鹽官新城臨安唐山至德二載置江東防禦使。治餘杭郡。乾

元元年復以爲杭州。置浙江西道節度。治昇州。尋徙蘇州。未幾兼餘杭軍使。治杭州。二年改置觀察使。治

蘇州。上元二年詔杭州刺史領防禦使。建中二年置鎮海軍節度於潤州。元和之後使名廢置不常。龍紀

元年復置杭州防禦使。景福元年賜號武勝軍防禦。二年陞爲都團練觀察。尋廢。移鎮海軍節度使治杭

州。已上使名歲次並見唐方鎮表。五代史記云光化元年移鎮海軍於杭州。景福二年至光化改元相去凡五年不同。是年始拜錢鏐爲節度使。俄而置都督府。又陞爲大都督

府。天祐四年以臨安縣衣錦城爲安國衣錦軍。朱梁開平元年改新城爲新登。以梁太祖父諱。改城曰登。二年改臨安爲

安國。事見五代史記。四年改唐山爲金昌。龍德三年析錢塘鹽官地置錢江縣。今仁和縣也。與錢塘分治城下。後唐同光

初復金昌爲昌化。石晉改爲橫山。又以爲吳昌。五代之亂。錢氏據有兩浙。幾百年。號吳越國。宋興。錢俶始事。貢獻。太平興國三年。朝於京師。遂納土焉。其年改錢江爲仁和。復新登爲新城。陸安國衣錦軍爲順化軍。治臨安縣。四年改吳昌爲昌化。五年廢順化軍。以其縣復隸杭州。淳化五年。詔以鎮海軍爲寧海軍。

浙右吳越餘杭故壤。開闢舊俗。有延陵廉遜之風。組練雄師。知孫武訓齊之令。控於滄溟。實曰大藩。宜更節制之名。用洽底甯之化。杭州鎮海軍改爲甯海軍。

陸南新場爲昭德縣。六年改爲南新縣。領縣

十。皇祐元年。管勾一路兵馬鈐轄司事。熙甯五年。廢南新爲鎮。隸新城縣。七年分浙東西爲兩路。

杭蘇湖潤常秀睦七

州爲西路宣和中。領浙西安撫使。建炎三年。翠華巡幸。是年十一月三日。陸杭州爲臨安府。復兼浙西兵馬鈐

轄司事。統縣九。錢塘。仁和。餘杭。臨安。富陽。於潛。新城。鹽官。昌化。紹興五年三月二十四日。指揮臨安府。車駕駐蹕之地。宜增重事權。依舊兼浙西安撫使云。

星度分野

周禮。保章氏以星土辨九州之地。所封之域。皆有分星。以觀妖祥。注云。星紀。吳越也。史記。天官書。漢書。天文志。皆云。牽牛。婺女。揚州。地理志云。吳地。斗分野也。晉書。天文志。隋書。地理志。皆示。自南斗十二度。至須女七度。爲星紀。於辰在丑。吳越之分野。屬揚州。費直起斗十度。蔡邕起斗六度。故永嘉中。歲星熒惑太白。

聚斗牛女之間。識者以爲吳越之地當興王者。又苻堅欲謀爲寇。石越對曰。今歲星鎮斗牛。福德在焉。垂象弗差。苻融曰。歲鎮在斗牛。吳越之福。五代史云。唐末。豫章人有善術者。望斗牛間有王氣。牛斗乃錢塘分野。

國史地理志。兩浙路當天文南斗須女之分。

風俗

吳地古揚州之境也。其俗躁勁揚輕。故曰揚州。或曰州界多水。水波揚也。周官職方氏曰。揚州之民。二男而五女。其畜宜鳥獸。其穀宜稻。吳越春秋云。人性脆而愚。水行山處。以船爲車。以楫爲馬。悅兵而敢死。漢志曰。吳粵之君皆尙勇。故其民好用劍。輕死易發。文身斷髮以避蛟龍之害。

應劭曰。常在水中。故斷此髮。文其身以象龍子。故不見傷害也。

數與

楚接戰。互相兼并。故吳越風俗略與楚同。隋志曰。江南之俗。火耕水耨。魚稻富饒。不憂飢餒。信鬼神。喜淫祀。又曰。吳郡餘杭。川澤沃衍。有海陸之饒。珍異所聚。商賈並湊。其人君子尙禮。庸庶敦龐。故風俗澄清而道教隆洽。亦其風氣所尙也。

國史地理志總敘兩浙路。以爲性敏柔而慧。尙浮屠氏之教。厚於滋味。急於進取。善於圖利。

州境

通典，太平寰宇記，皆云，杭州乃春秋越國之西境，西北至禦二作語兒，分界在吳郡嘉興縣南，今秀州崇德縣有禦兒鄉是也。又周顯王四十六年，楚威王伐越，破之，盡取其地，至於浙江之北。

東西六百六十七里一百三十六步。

南北九十九里三十三步。

四至八到

東至秀州界，一百二十九里，自界首至本州，一百二十里。

西至徽州界，二百四十三里，自界首至本州，九十里。

南至紹興府界，三十六里，自界首至本府，九十里。

北至湖州界，五十四里，自界首至本州，一百八里。

東南到紹興府界，三十六里，自界首至本府，一百三十五里。

西南到嚴州界，一百五十三里，自界首至本州，一百二十一里。

東北到秀州界，九十三里，自界首至本州，九十七里。

西北到宣州界，一百九十八里，自界首至本州，二百一十里。

去兩京地里

東京二千二百里。西京二千五百里。

陸路

西至昱嶺二百四十三里。入徽州界。

北至導墩五十四里。入湖州界。

東北至七里店九十三里。入秀州界。

西北至千秋嶺一百九十八里。入宣州界。

南至白峯鋪一百五十三里。入嚴州界。

水路

東至浙江沿海郭瀝港一百二十九里。入秀州界。

南至浙江中流三十六里。入紹興府界。

北至下塘大港導墩五十四里。入湖州界。

東北至上塘運河七里店九十三里。入秀州界。

東南至浙江中流三十六里。入紹興府界。

西南自浙江入溪至白峯，一百五十三里，入嚴州界。

縣

望錢塘。

望仁和。

望餘杭。

望臨安。

緊富陽。

緊於潛。

上新城。

上鹽官。

中昌化。

鎮

江漲橋鎮。

臨平鎮。

范浦鎮。

右並端拱元年置，隸仁和縣。

湯村鎮。

右本仁和鎮，端拱元年改隸仁和縣。

南新鎮。

右熙甯五年置，隸新城縣。

在城八廂

吏部注大小使臣分治烟火賊盜公事

宮城。

左一。

左二。

左三。

右一。 右二。 右三。 右四。

城南北兩廂

紹興十年五月七日，郡守俞侯奏請，府城之外，南北相距三十里，人烟繁盛，各比一邑，乞於江漲橋浙江置城南北左右廂，差新募民資序京朝官主管本廂公事，杖六十以下罪聽決，奉聖旨依。

城南左廂

舊治便門外一里，浙江跨浦橋北，今徙於白壁營。

城北右廂

治餘杭門外六里，江漲橋鎮。

城東西都巡檢使

乾道三年四月二十日，郡守王炎奏請，以城外東西廂地分廣闊，巡邏稀疎，乞於見任官內，遴選有武勇之人二員，兼城東西巡檢使，各差軍兵三十人，帶器械巡警，措置賊盜，奉聖旨依。

城東都巡檢使司

治城東一里，羅漢院之南。

城西都巡檢使司

治城西三里，赤山之南。

城社門附。

九域志：隋楊素剏州城，周回三十六里九十步，有城門十二，東曰便門，保安、崇新、東青、艮山、新門，西曰錢湖、清波、豐豫、錢塘，南曰嘉會，北曰餘杭，有水門五，東曰保安，南水，西水，北曰天宗、餘杭。實治通鑑載唐景福二年，錢錫發民夫二十萬。

及十三都軍士，築杭州羅城，周七十里，南門曰龍山，東門曰竹車，南土，北土，保德，北門曰北關，西門曰涌水，西關，城中又有門曰朝天門，曰炭橋新門，曰鹽橋門，今廢，土人猶以門稱焉。

社壇舊在利涉門內。今嘉會門。一百步。今徙於城西一里昭慶寺。

戶口

自陳置錢塘郡。隋廢郡爲杭州。戶一萬五千三百八十。唐貞觀中。戶三萬五百七十一。口一十五萬三千七百二十九。開元中。戶八萬六千二百五十八。太平寰宇記載皇朝初。戶主六萬一千六百八。客八千八百五十七。九域志。戶一十六萬四千二百九十三。客三萬八千五百二十三。兩朝國史。戶二十萬五千五百六十九。今戶二十六萬一千六百九十二。口五十五萬二千六百七。

廡舍

府治舊在鳳凰山之右。子城南曰通越門。北曰雙門。錢氏舊造。至和元年。部守資政殿學士給事中孫沔重建。樞密直學士蔡襄撰記并書刻石於門之右。建炎四年。

翠華駐蹕。今徙治清波門之北。以奉國尼寺。即淨因寺。故基創建。

兩浙轉運衙。太平興國三年。錢氏納土。是年五月丙戌。始置轉運使。以刑部郎中楊克遜充兩浙西南路轉運使。宗正寺丞趙齊副之。祠部郎中劉保助充兩浙東北路轉運使。右拾遺鄭遜副之。熙寧七年四月癸巳。檢正中書刑房公事沈括言。欲乞分浙東西爲兩浙路轉運使。於杭州置司。杭蘇湖常秀睦潤七州爲浙西路。越明台婺溫衢處七州爲浙

東路。詔從之。舊治在雙門之北。爲東北兩衙。今徙於湧金門南。爲轉運東西兩衙。

提舉市舶衙。舊在城中。淳化三年四月庚午。移杭州市舶司於明州定海縣。以監察御史張肅領之。

今在市舶

通判南廳在府衙南。

通判北廳在府衙東。

安撫司參議官主管機宜文字幹辦公事廳舍。在府治之左右。
僉判、察判、節推、察推、司戶、司法、教授廳舍。並在府治之左右。

府院在府衙門之西。

錄事參軍
廳舍附之。

左司理院在府衙之東。

司理參軍
廳舍附之。

右司理院在府衙之西。

司理參軍
廳舍附之。

學校

至聖文宣王廟，舊在府治之南，子城通越門外，有稽古閣，奉安御書。宣和中，本路廉訪使降御書殿榜曰：

大成。錢塘仁和縣學附焉。

六經齋十二

經德。進德。炳文。兌習。頤正。賁文。蒙養。時升。益明。履信。

復古。賓賢。

建炎以來，遷徙不常。紹興元年，於凌家橋東，以慧安寺故基重建。

六齋

經德。敦厚。彌新。升俊。富文。賁文。

科舉

舊制，三歲應詔解七人，崇甯頒三舍法於學，歲貢七人，宣和五年復科舉，三歲解十四人，紹興二十六年增西北流寓解額三人，今解十七人。

軍營兵籍附。

禁軍。

東南第三將自錢氏納土之後准朝廷處分屯駐劄。

寨在東青門裏。

有正副將各一員押隊官二員原管步

軍九指揮大觀四年三月奉聖旨撥威果第二十八雄節第九指揮往平江府駐劄宣和二年因討睦州方寇准殿前司備奉指揮撥到威捷第一指揮馬軍并全捷第二第三指揮步軍並屬本將駐劄共見管八指揮原額四千八十人。

威捷第一指揮原額五百。

威捷第四指揮。

威果第五指揮。

威果第六指揮。

雄節第八指揮。

雄節第十六指揮。

全捷第二指揮。

全捷第三指揮以上額同。

京畿第二將元係東京畿縣陳留雍邱尉氏鄆陵陽武屯駐人兵建炎元年十一月准樞密院劄子差隨

統領劉俊前來杭州，收捕陳通，續准樞密院劄子，備奉聖旨，存留本將人馬在杭州，就糧駐劄。營寨在東青門裏。有

正副將各一員，押隊官三員，共管一十六指揮，元額七千六百六十人。

武騎第二指揮，元額四百一十人。

武騎第六指揮。

廣勇左一四指揮。

廣勇左一五指揮。

廣勇左一六指揮，以上額同。

廣捷第四指揮，元額五百一十人。

廣捷第五指揮。

廣捷第六指揮。

捷節第五指揮。

驍猛第一指揮。

神威第九指揮。

雄勇第二指揮。

雄威第六指揮。

効忠第二十四指揮。

効忠第七十五指揮。

効忠第七十七指揮。以上額同。

兵馬鈐轄司軍兵。內雄節、威果、全捷三指揮。於熙甯三年以後招置。宣和二年分撥宿州屯駐軍龍騎歸

遠二指揮軍兵前來討捕睦州方寇。續准指揮留屯於杭州。營寨在東青門外。係本府兵馬鈐轄管轄。共管五指揮。

原額二千五十人。

雄節第七十指揮。元額四百一十人。

威果第六十一指揮。

全捷第十七指揮。

龍騎指揮。

歸遠指揮。以上額同。

諸寨土軍一十三處。原額共管一千三百六十六人。

外沙巡檢司寨。在候潮門外。元額管土軍一百二十人。

海內巡檢司寨。在嘉會門外。同。

管界巡檢司寨。在餘杭門外。同。

茶槽巡檢司寨。在東青門外。同。

南蕩巡檢司寨。在錢塘縣界。元額管土軍九十六人。

東梓巡檢司寨。在富陽縣界。元額管土軍一百二十人。

上管巡檢司寨。在鹽官縣界。元額管土軍一百二十人。

緒山巡檢司寨。在仁和鹽官兩縣界。同。

黃灣巡檢司寨。在鹽官縣界。同。

硤石巡檢司寨。在鹽官縣界。元額管土軍一百人。

奉口巡檢司寨在錢塘仁和縣界同。

許村巡檢司寨在鹽官縣界同。

下塘巡檢司寨在仁和縣界。元額管土軍三十人。

廂軍。

崇節第一指揮。額管五百人。

崇節第二指揮。額同。

崇節第三指揮。額同。

崇節第四指揮。額同。

崇節第五指揮。額管四百人。

崇節第六指揮。額同。

捍江第一指揮。額同。

捍江第二指揮。額同。

捍江第三指揮，額同。

捍江第四指揮，額同。

捍江第五指揮，額管四百人。

修江指揮，額管一百二十人。

都作院指揮，額管四百八十人。

小作院指揮，額管一百人。

清湖閘指揮，額管七百人。

開湖司指揮，額管二百人。

北城堰指揮，額管二百人。

西河廣濟指揮，額管三百人。

樓店務指揮額同上

長安堰閘指揮額管一百人

秤斗務指揮額管四十八人

北城指揮額管三百人

鼓角匠指揮額管二十五人

橫江水軍指揮額管二十四人

船務指揮額管二百八十人

牢城指揮無額，乾道五年八月分軍籍見管八百二十四人

坊市

左一廂

市西坊，通西巷。

太平坊，新街巷。

清河坊，清河坊巷。

回濤坊，吳山井後巷。

徑山坊，織眉山巷。

淨因坊，樓店務巷。

善化坊，竹園山巷。

左二廂。

修義坊，凌椒薑巷。

教睦坊，銀鑲後巷。

秀義坊，下百戲巷。

修文坊，修文巷。

保信坊，剪刀股巷。

睦親坊，官巷。

市南坊，巾子巷。

融和坊，肉市巷。

吳山坊，吳山井巷。

通浙坊，天井巷。

大隱坊，都酒務巷。

豐豫坊，府學巷。

懷慶坊，雙月山巷。

樂衆坊，南棚巷。

積善坊，上百戲巷。

壽安坊，官巷。

里仁坊，陶家巷。

定民坊，中棚巷。

純禮坊，後洋街巷。

保和坊，甄街巷。

報恩坊，觀巷。

左三廂。

欽善坊，開扇子巷。

甘泉坊，相國井巷。

清風坊，活水巷。

興慶坊，前洋街巷。

德化坊，木子巷。

右一廂。

孝仁坊，清平山巷。

貴恕坊，相府巷。

壽域坊，繖料院巷。

保甯坊，太廟巷。

天慶坊，天慶觀巷。

保民坊，吳山廟巷。

長慶坊，竹竿巷。

懷信坊，糖糰巷。

常慶坊，柴梁橋巷。

右二廂。

清平坊，沙皮巷。

興禮坊，清洽橋巷。

通和坊，金波橋巷。

延福坊，壩東巷。

蘭陵坊。水巷。

武志坊。李博士橋巷。

新安坊。小新橋巷。

祈祥坊。北橋巷。

普甯坊。清遠橋巷。

教欽坊。竹竿巷。

招賢坊。仁和縣巷。

右三廂。

東坊。中沙後巷。

善履坊。豐樂橋巷。

豐禾坊。豐禾倉巷。

富樂坊。蒲橋巷。

右四廂。

甯海坊。鐵碇巷。

義和坊。炭橋巷。

戒民坊。棚橋巷。

延定坊。鵝鴨橋巷。

懷遠坊。軍頭司巷。

同德坊。燈心巷。

嘉新坊。十郎堂巷。

安國坊。仁和倉巷。

西坊。中沙前巷。

興德坊。照橋巷。

昌樂坊。藍橋巷。

界分

錢塘縣

南城界

溫泉界

中路南下分界

外河界

西湖門南界

三教門界

西一界

東一界

東西一下分界

三橋南界

壩北界

中棚界

西城界

中路南上分界

中路北界

州內界

西湖門北界

吳山北界

西二界

東二界

淨因寺界

三橋北界

開道坊界

井亭橋北界

橋南界。

後杭界。

木子西界。

仁和縣。

中濠南界。

小新營界。

妙慈界。

壩東界。

永新橋界。

西營界。

橋梁

都亭驛橋。

阜民橋。

望仙橋。

橋北界。

木子東界。

西莊界。

衆安東界。

東營界。

沙河東界。

中濠北界。

中濠西界。

仁和界。

州橋。

過軍橋。

三聖廟橋。

洪橋。

通江橋。

柴塚橋。

薦橋。
蒲橋。
葛公橋。
瓦子前橋。
巧兒橋。
舍兒橋。
炭橋。
新橋。
軍頭司木橋。
天水院橋。
祥符橋。
樓店務橋。
凌家橋。

道明橋。
鹽橋。
鍾公橋。
瓦子後橋。
亨橋。
永清橋。
李博士橋。
鵝鴨橋。
清遠橋。
回龍橋。
衆安橋。
石橋。
仁壽橋。

一名觀橋

豐樂橋。
梅家橋。
清冷橋。
金波橋。
貓兒橋。
水巷橋。
棚橋。
北橋。
仁和倉橋。
貢院橋。
淨因寺橋。
本橋。
轉運衙石橋。

渡子橋、施家橋、將軍橋、紅橋、洗麩橋、結縛橋、紀家橋、新莊橋、便橋。

六房院橋、侍郎橋、施水坊橋、鞞鼓橋、清湖橋、左藏庫橋、車橋、師姑橋。

金文橋、三橋、井亭橋、馬家橋、石灰橋、丁家橋、楊四姑橋、斜橋。

物產

禹貢揚州篠蕩既敷。厥草惟夭。厥木惟喬。周官職方氏揚州其利金錫竹箭。其畜宜鳥獸。其穀宜稻。舊經云。產白編綾、緋綾、藤紙、木瓜、橘、蜜蠶、牛膝、地黃。

今產

穀

烏藥。	青蒿子。	貫衆。	黃菁。	石竹。	牽牛。	鸚粟。	白朮。	茶。	綾。	杭。
獨活。	千年潤。	牡丹皮。	草烏頭。	茵陳。	地骨皮。	薄荷。	茱萸。	鹽。	絹。	縵。
升麻。	香薷。	杜仲。	菊花。	白薇。	牛蒡子。	紫蘇子。	菖蒲。	貨。	衣。	粟。
蒲黃。	益母子。	車前子。	旋復花。	藜蘆。	地膚子。	麥門冬。	芍藥。	絲。	布。	麥。
槲木。	千金草。	秦皮。	枸杞。	常山。	乾葛。	天南星。	桑白皮。	蜜。	絲。	麥。
百部根。	地扁蓄。	石燕子。	半夏。	葶藶。	天花粉。	白芨。	五茄皮。	蠟。	羅。	麻。
躑躅花。	鉤藤。	前胡。	鬼箭。	劉寄奴。	馬兜鈴。	香附子。	地榆。	紙。	紬。	豆。
榆白皮。	蛇床子。	寒水石。	山豆根。	葳靈仙。	丹參。	牛膝。	白芷。		紗。	
澤蘭。	黃皮。	枳實。	茯苓。	山藥。	苦參。	何首烏。	地黃。			
鳳眼草。	苦楝皮。	續斷。	瞿麥。	五倍子。	沙參。	百合。	荆芥。			

金星草。覆盆子。木通。白蘚皮。

果

藕。橘。菱。橙。枇杷。櫻桃。石榴。木瓜。林檎。楊梅。雞頭。銀杏。甘蔗。蓮。芡菰。

花

牡丹。芍藥。酴醾。棣棠。海棠。金林檎。御李。緋桃。滴滴金。碧桃。

紅杏。長春。王簪。水仙。玉梅。薔薇。佛見笑。聚八仙。粉團。山茶。

海紅。徘徊。百合。梔子。翦紅羅。石竹。薺草。密友。金鐘。蜀葵。

千葉蓮。佛頭蓮。紅榴。木犀。丹桂。木芙蓉。黃菊。山丹。白菊。臘梅。

香梅。千葉梅。福梅。瑞香。

木

樟。桑。梓。栢。松。柏。桐。榿。櫟。槐。杉。楮。桂。榲。檉。

楓。柳。榆。

竹

箸。筥。金。淡。紫。斑。

土貢

禹貢揚州厥貢惟金三品。厥篚織貝。厥包橘柚錫貢。唐書地理志貢白編綾、緋綾、藤紙、木瓜、橘、蜜薑、乾薑、芑、牛膝。太平寰宇記歲貢乾地黃、牛膝、藤紙、蜜。九域志貢綾三十疋、藤紙一千張。兩朝國史貢藏糟瓜薑、祥符舊經貢山茶、楊梅、筍、絹、納綿子、薑、甘蔗。

今貢

綾三十疋。

稅賦

茶租免役
和預買附

夏稅

每歲婺州給本府衣絹二千五百疋、紬三千疋、又衣綿三萬五千兩、徽州給本府衣絹七千四十疋、綿二萬七千三百五十兩。

絹九萬五千八百一十三疋二尺四寸三分七釐。

紬四千四百八十六疋三丈四尺八寸一分二釐。

綾五千二百三十四匹一尺。

綿五萬八千五百二十一兩二錢二分八釐。

秋稅

苗米一十二萬三千七百一十三石六斗八升一合一勺七撮。

茶租錢一萬一千六百八十九貫一百四十三文。

免役錢一十二萬一千八百八十五貫七百八十五文。

和預買。

每歲認發江陰軍和買紬七十
二疋二丈一尺四寸三分五釐。

折帛錢九千二百七十八貫五百一十八文。

絹四萬三百九十九疋二丈六尺二寸三分五釐。

紬七百九十五疋。

折帛錢六十四萬八千三百八十五貫五百一十八文。

倉場庫務錢監作院附。

鎮城倉在餘杭門裏。

都鹽倉在天宗門裏。

常平義倉在餘杭門裏。

合同茶場在湧金門裏。
糠場在太宗水門裏。
城南炭場在候潮門裏。
城北炭場在餘杭門外。
軍資庫在府衙門之左。
常平庫在府衙門之左。
公使庫在府衙門之東。
甲仗庫在府衙之東。
架閣庫在府衙之北。
公使酒庫在府衙之西。
祇備庫在府衙之西。
什物庫在府衙之西。
輜擔庫在府衙之西。
醋庫一十八處。分在府城內外。

都稅院在壩頭市東。抵當庫平準務
秤對局附焉。

龍山稅務在嘉會門外。

浙江稅務在浙江岸跨浦橋南。

北郭稅務在餘杭門外。

江漲橋稅務在江漲橋鎮市。

紅亭稅務在崇新門外。

樓店稅務在府衙之東。

市舶稅務在保安門外諸家橋之東。

酒務五處。乾道二年五月二十五日，戶部侍郎曾懷申請併歸戶部贍軍庫，取三年所趁息錢，以一年酌中之數爲額，卻於贍軍庫取趁息錢內撥還臨安府，奉聖旨依奏。

都酒稅務在清河坊西。

南比較稅務一名武林園在壩頭市南。

北比較稅務一名虎泡泉在後洋街。

龍山酒務在龍山白塔嶺下。

江漲橋務在江漲橋鎮市。

都作院在湧金門之北。小作院附之。

錢監。大唐寶興鑄錢監在龍山相近。吳郡圖經曰。每歲官取長洲縣白塔土爲錢塘鑄錢監用。今藉田園。乃故基也。旁有長生水池。大中祥符九年五月戊申。江淮兩浙發運使李浦言。饒池江杭四州錢監每歲共鑄錢一百二十萬貫。用銅四百五十三萬斤。今廢。

館驛 亭堂樓閣關軒附。

樟亭驛。晏殊輿地志云。在錢塘縣舊治之南五里。白居易有宿樟亭驛詩。羅隱。乾符五年夏。登是驛看湖。有詩。廢。

郵亭驛在朝天門外。中間改名天策。今爲昇陽宮。

仁和館在清湖岡之南。紹興十九年。郡守湯鵬舉重建。

亭

南園巽亭。慶歷三年。郡守蔣堂於舊治之東南建巽亭。以對江山之勝。崇甯三年。蔣之奇作詩紀其事。

胡密

詩云武林天下
奇巽亭境中絕。

介亭在舊治後聖果寺。熙甯中郡守祖無擇對排衙石作介亭。左江右湖千里在目。無擇爲介亭銘序云。亭前有石二僧。自北而南二十舉趾。高踰再仞。有若衙道。故諺以排衙稱。因名其亭曰介亭。銘曰。猗歟茲亭。仁智是經。控帶山海。周旋日星。嘉乃成績。取石於易。惟介之義。以敏厥德。

東坡居士錢楊次公於此亭。詩云。丹
青明滅風篁嶺。環佩空響桃花源。郡

人謂介亭山下爲

桃源路也。今廢。

清風亭在中和堂之側。直望海門。廢。

曲水亭在舊治。治平中郡守舍人沈遼建。今廢。

望越亭在舊治後。慶曆中郡守蔣堂建。政和元年郡守張閣遷巽亭於此。遂廢。

碧波亭。晏殊輿地志云。在舊治子城北門外。五代史載錢氏大閱兵於碧波亭。亭塔臨水。而闊數丈。元豐中郡守張詵重建。廢。

隆禮亭。祥符舊經云。在郡城錢塘舊治之南。到縣一十三里。廢。

敦禮亭。祥符舊經云。在郡城錢塘舊治之南。到縣一十二里。廢。

崇禮亭。祥符舊經云。在郡城錢塘舊治之南。到縣一十一里。廢。

鳳凰亭。祥符舊經云。在通判舊治。廢。

集賢亭。在豐豫門外湖堂前。廢。

潺湲亭。古稱阿閃佛塔。亭傍有溝。引湖水以注相國井。而水衝突沸騰。遂名潺湲亭。廢。

通遠亭。祥符舊經云。在錢塘舊治北。到縣四里。廢。

橘園亭。在鹽橋之南。乾道五年。郡守周淙重脩。

馭舟亭。在鹽橋之北。

安濟亭。祥符舊經云。在錢塘舊治南。到縣二十里。

浙江亭。祥符舊經云。在錢塘舊治南。到縣一十五里。

堂

有美堂。在郡城吳山。嘉祐二年。龍圖閣直學士梅摯出守杭州。仁宗賜詩寵行。摯乃取詩之首章。以名有

美堂。詩見牧守門。歐陽修記曰。夫舉天下之至美。與其樂有不得而兼焉者多矣。故窮山水登臨之美者。必之

乎寬閒之野。寂寞之鄉。而後得焉。覽人物之盛麗。誇都邑之雄富者。必據乎四達之衝。舟車之會。而後足

焉。蓋彼放心於物外，而此娛意於繁華，二者各有適焉。然其爲樂，不得而兼也。今夫所謂羅浮、天台、衡岳、廬阜、洞庭之廣，三峽之險，號爲東南奇偉秀絕者，乃皆在乎下州小邑僻陋之鄉。此幽潛之士窮愁放逐之臣之所樂也。若乃四方之所聚，百貨之所交，物盛人衆，爲一都會，而又能兼有山水之美，以資富貴之娛者，惟金陵錢塘。然二邦皆僭竊於亂世，及聖宋受命，海內爲一，金陵以後服見誅，今其江山雖在，而頽垣廢址，荒烟野草，過而覽者，莫不爲之躊躇而悽愴。獨錢塘自五代時，知尊中國，効臣順，及其亡也，頓首請命，不煩干戈。今其民幸富足安樂，又其俗習工巧，邑屋華麗，蓋十餘萬家，環以湖山，左右映帶，而閩商海賈，風帆浪舶，出入於江濤浩渺，烟雲杳瀛之間，可謂盛矣。而臨是邦者，必皆朝廷公卿大臣，若天子之侍從，又有四方游士爲之賓客，故喜占形勝，治亭榭，相與極遊覽之娛。然其於所取，有得於此者，必有遺於彼。獨所謂有美堂者，山水登臨之美，人物邑居之繁，一寓目而盡得之。蓋錢塘兼有天下之美，而斯堂者，又盡得錢塘之美焉。宜乎公之甚愛而難忘也。梅公清今上御名，好學君子也。視其所以，可以知其人焉。四月八月丁亥，廬陵歐陽修記。蔡襄書碑，摯又賦五言詩六篇，皆以有美堂新建爲篇首。錢氏初建江湖亭於此，一時名流皆有詩，今廢。

中和堂在舊治，又有清風亭，在堂之偏。望海樓在堂北。建炎三年四月壬戌，光堯太上皇帝來登斯堂，遠

闕稽山。思夏后之功。俯瞰濤江。懷子胥之烈。御製古詩一首。六龍轉淮海。萬騎臨吳津。王者本無外。駕言蘇遠民。瞻彼草木秀。感此瘡痍新。登堂望稽山。懷哉夏禹勤。神功既盛大。後世蒙其仁。願同越勾踐。焦思先吾身。艱難務遵養。聖賢有屈伸。高風動君子。屬意種蠶臣。又御書謂斯堂偉特之觀。無愧上都。薰風南來。我意雖快。願與庶人共之。後改爲偉觀堂。先是錢氏武肅王建閱禮堂。至和三年。郡守孫沔重修。棟宇宏麗。輪奐一新。更名中和堂。

趙抃詩云。老來重守鳳凰城。千里人心豈易平。樂職古賢形曠頌。中和終不爲虛名。後人以爲酒名。

虛白堂。舊圖經云。在舊治。晏殊輿地志云。爲刺史在官清嚴。人無犯者。唐長慶中。刺史白居易有詩。刻石堂上。羅隱虛白堂牡丹詩云。莫背欄干便相笑。與君俱受主人恩。蓋謂白太傅手植此花也。郡守梅摯十詩。皆以堂有虛白閣爲首章。堂前有紫薇兩本。世傳居易所植。蘇軾有虛白堂紫薇花詩。

清暑堂。治平三年。郡守蔡襄建。在州治之左。并撰記及書。刻石堂上。廢。

秋香堂。在漕憲舊治。轉運使劉旣濟建。廢。

湖堂。在豐豫門外。堂前有集賢亭。廢。

三賢堂。在孤山竹閣。有白樂天。林君復。蘇子瞻三賢像。後廢不存。乾道五年。郡守周淙重建於水仙王廟之東廡。

講易堂在府治之東。紹興十六年，郡守張澄建，張僞名爲吏隱堂。隆興元年，陳輝改今名。中書舍人張孝祥書左朝請大夫葛立方撰記。

樓

東樓

一名望海樓

在舊治中和堂之北。太平寰宇記云：高十八丈。唐武德七年置。廢。

十三間樓，去錢塘門二里許。蘇軾治杭日，多治事於此。廢。

豐豫門湧金樓。政和六年，郡守徐鑄以豐豫門樓墜損，命鈐轄楊靖重建，頗極壯麗。榜曰湧金樓。

聳翠樓在豐豫門外。政和七年，郡守徐鑄命鈐轄楊靖於湖堂之右，以衆樂亭舊趾臨湖爲聳翠樓。

今豐樂樓

望湖樓

一名看經樓

乾德五年，忠懿王錢氏建。去錢塘門一里。蘇軾有望湖樓詩。

觀

雲濤觀在舊治。政和元年，郡守張閣旣徙巽亭，以其舊址更造。廢。

閣

儒賢亭會之閣。故相劉正夫之居。在萬松嶺東青平門。

青平乃公舊里，號青平里。時人因以此名之。

政和三年，勅建御書閣，賜是名。

廢。

一德格天之閣。紹興中。御書賜太師秦檜之居。廢。

望海閣在漕臺。舊治。廢。

白公竹閣在孤山。與柏堂相連。有唐刺史白居易祠。蘇軾有竹閣柏堂二詩。

巢居閣。林逋故廬有此閣。或云在寶雲寺。卽雲巢也。

紅梅閣在府治。

軒

石林軒在舊治後。至和中。郡守孫沔初建。號燕思閣。又取臨安縣淨土寺立石七株。置之閣前。蒼然奇怪。號七賢石。元祐中。郡守蒲宗孟改名石林軒。廢。

乾道臨安志卷第三

牧守政績附。

歷代

全琮。

黃武五年，吳孫權分三郡險地爲東安郡。全琮領郡太守，治富春。明賞罰，招誘降附，數月中得萬餘人。召還琮，字子璜，錢唐人。見吳志。

柳沖。

唐貞觀中，爲杭州刺史，有能名。蒲州虞鄉人。

袁仁敬。

開元十三年，明皇自擇刺史，凡十一人。大理少卿袁仁敬爲杭州刺史，治行，諸宰相諸王御史以上，祖道洛濱，盛具奏太常樂，帛舫水嬉，命高力士賜詩，帝親書，且給筆札令自賦。

崔渙。

肅宗時，爲左散騎常侍，餘杭太守，江東採訪使，博陵安平人。

房孺復。

唐貞元初。韋應物爲蘇州牧。房孺復爲杭州牧。韋嗜詩。孺復嗜酒。每與賓友一醉一詠。其風流雅韻多播於吳中。或目韋房爲詩酒仙。見白居易吳郡詩石記。元和姓纂云。孺復。河南人。

李泌。

字長源。代宗朝。爲杭州刺史。引湖水入城爲六井。以利民。爲政有風績。德宗在奉天。召赴行在。授左散騎常侍。拜中書侍郎。同中書門下平章事。封鄴縣侯。

白居易。

字樂天。事唐穆宗爲中書舍人。長慶二年七月。出爲杭州刺史。始築堤捍錢塘湖。鍾洩其水。溉田千頃。復濬李泌六井。民賴其汲。久之以太子左庶子。分司東都。封馮翊縣侯。

李宗閔。

字損之。文宗時。爲杭州刺史。

宣祖廟諱
下一字 亮。

爲給事中。杭州刺史。

裴夷直。

字禮卿。武宗時。自中書舍人出爲杭州刺史。

李中敏。

字藏之。隴西人。唐文宗開成末。爲杭州刺史。

李錡。

唐淄川王五世孫。自雅王傳出。爲杭州刺史。居三歲。遷浙西。觀察諸道鹽鐵轉運使。

于邵。

字相門。京兆萬年人。以右諫議大夫知制誥。拜杭州刺史。

楊憑。

字虛受。治京兆。有政績。後徙杭州刺史。

崔彥曾。

懿宗朝。咸通二年。爲杭州刺史。地理志。

右並見唐書。

韋復

虞部郎中。杭州刺史。京兆杜陵人。

崔恂

水部郎中。杭州刺史。鄭州人。

裴常棣

兵部郎中。杭州刺史。河東聞喜人。白居易冷泉亭記曰。觀風亭。常棣所建。

獨孤嶼

侍御史。杭州刺史。洛陽人。

李自挹

杭州刺史。唐宗室。

封亮

司封員外郎。杭州刺史。渤海人。

雙士恪

右武衛大將軍。定相二州總管。杭州刺史。呂國公。天水郡人。

薛自勉。

司助員外郎。餘杭太守。河東汾陰人。

薛瑩。

杭州刺史。河東汾陰人。

盧澗。

杭州刺史。范陽涿縣人。

楊行矩。

蔡州總管。杭州刺史。上蔡人。

柳楚賢。

光祿少卿。杭州刺史。河東解縣人。

柳德義。

杭州刺史。河東人。

史令卿。

祠部郎中。杭州刺史。建康人。

杜信。

刑部員外郎。杭州刺史。京兆人。

右見元和姓纂。

相里尹造。

韓僕射皐。

給事中盧元輔。

右司郎中河南元英。

右四人及裴常棣。見白居易冷泉亭記。

王顏。

貞元六年爲杭州刺史。見國一禪師塔銘。

杜陟。

陸則。

李幼。

崔鄴。

路異。

右五人。並杭州刺史。與白居易、盧元輔、裘常棣、楊憑九人。皆曾造僧慧琳之室。論心要。見慧琳碑。

周寶。

爲杭州刺史。後唐僖宗時羣盜起。寶募諸縣鄉兵討之。號八都兵。見五代史。

國朝。

范晏。

太平興國三年三月己酉。吳越國王錢俶朝于乾德殿。是年俶乃納土。五月丙戌。太宗皇帝始命水部

郎中范晏爲考功郎中。知杭州。左贊善大夫孟貽孫通判事。自是名卿鉅公接武而至。舊常記姓名於

廳事。燦然可觀也。至建炎間。兵戈擾攘。城邑隳廢。牧守姓氏。隨亦湮沒。於是博考載籍。咨詢耆舊。質諸

太史氏。自太平興國戊寅歲。訖紹興辛亥。凡一百五十三年。僅得范晏而下一百人。再除者一十三人。三除者一。官稱

名字。除授歲月。及史官所紀善政美績。編列於左。疑者闕焉。自紹興辛亥以後。則有太學博士何浦所

撰題名記云。浦一作博。

李繼凝。

太宗卽位，轉刑部員外郎，充兩浙轉運使，尋知杭州，召還闕，改刑部郎中，充樞密直學士，劉知信。

端拱二年四月丁卯，以邕州觀察使劉知信知杭州。

王化基。

淳化四年五月庚戌，以工部侍郎王化基知杭州，遷禮部，召還，以本官參知政事，本傳，字永圖，真定府人，嘗作東南行百韻，好事者傳誦之。

魏羽。

字垂夫，歙州婺源人，拜給事中，知潭州，徙知杭州，真宗卽位，遷工部侍郎，召還。

張去華。

至道三年六月丙午，以給事中新知益州張去華知杭州，咸平二年四月戊寅，徙知蘇州。

張詠。

咸平二年四月戊寅，以御史中丞張詠爲工部侍郎知杭州，本傳，詠以剛方自任，以嚴猛爲治，御下甚峻，性躁急果決，郡事都出於獨斷，屬歲歉，民多鬻私鹽以自給，犯者甚衆，連捕數百人，詠悉寬其罰而遺之，官屬請曰：「不痛繩之，恐無以禁。」詠曰：「錢塘十萬民，飢者八九，苟不以鹽自活，一旦蜂聚數千輩爲

寇盜則其患甚矣。當俟秋成，乃仍舊法。是歲民獲安濟。又有民家子與姊塔訟家財。塔言妻父臨終，此子三歲，故見命掌貨產。且有遺書，令異日以十之三付子，餘七分與塔。詠覽之，以酒酹地曰：汝妻父，智人也。以子幼甚，故託汝。倘違以家財十之七與子，則子死於汝手矣。亟命以十之七給其子，餘三分給塔。皆服其明斷。拜泣而去。咸平四年九月辛卯，杭州民詣闕獻土星圖一，銀百兩，乞留知州。詔獎詠，仍還其銀。代還知永興軍府，拜尚書右丞。字復之，濮州鄆城人。自號乖崖公。

宋太初

咸平五年五月癸丑，以右諫議大夫宋太初知杭州。是年十一月甲午，徙知廬州。太初字永初，澤州晉城人。

王仲華

咸平五年十一月甲午，以太常少卿知蘇州。王仲華爲右諫議大夫知杭州。六年十月戊午，徙知處州。薛暎

咸平六年六月丁亥，以禮部郎中、知制誥、權判度支薛暎爲諫議大夫知杭州。

本傳景德初知杭州，而咸平六年十月前守王仲華方徙

處州。登次年
曠方到官耶。

字景陽。臨決讞銳。州無留事。是時起居舍人直史館姚鉉爲轉運使。檄屬郡當直司。毋得輒斷徒以上罪。曠卽奏。徒流笞杖。自有科條。苟情狀明白。何須繫獄以累和氣。請詔天下。凡徒流罪人。於長史前對辯。如無所異。聽遣決之。朝廷施用其言。在杭五年。其治嚴明。吏不能欺。每五鼓冠帶黎明。據案決事。雖寒暑無一日異。入知通進銀臺司。兼門下封駁事。

王濟。

景德四年九月辛巳。以工部員外郎兼侍御史知雜事王濟。爲工部郎中。知杭州。本傳。字巨川。性剛直。無所畏避。出知杭州。真宗面加慰諭。大中祥符四年遷刑部。郡城西有錢塘湖。可溉田千餘頃。歲久湮塞。命工濬治。增置斗門。以備潰溢之患。仍以白居易舊記刻石湖側。民頗利之。徙居洪州。

戚綸。

大中祥符三年九月壬午。以樞密直學士戶部郎中戚綸知杭川。就加左司郎中。五年正月甲戌。綸與轉運使陳堯佐言。浙江壞岸。漸逼州城。望遣使自京師部埽匠壕塞赴州工役。詔從之。令馳驛而往。命轉運使更互檢校。遂以埽岸易柱石之制。雖免水患。而衆頗非其變法。七年三月癸卯。徙知揚州。綸本傳。字仲言。應天府楚邱人。

薛顏

大中祥符七年三月癸卯，以司封郎中薛顏爲太僕少卿知杭州。八年七月丁卯，以新修冊府元龜分送洪、杭二州。

馬亮

大中祥符九年九月己酉，徙工部侍郎知昇州馬亮知杭州。丁卯，詔如聞杭州葺江岸卒，執役水中，苦足疾而死者甚衆，宜令知州馬亮拯療之。十月己卯，加集賢院學士。亮本傳，字叔明，有治劇才。先是江濤大溢，調兵築隄而工未就，詔問亮所以扞江之策。亮至，禱於伍員祠下，明日潮爲之卻。又出橫沙數里，隄遂以成。又上言近歲以來，父祖未葬而多別財異爨，甚傷風教，請自今未葬者不得析居。明年改

工部侍郎知廬州。

真宗朝致仕，諡忠肅。

王欽若

天禧三年六月甲午，尙書左僕射兼中書門下平章事王欽若除太子太保，判杭州。又詔曰：鈞衡翊贊，素彰勸善之心；藩翰鎮臨，方佇惠和之績。眷言寄任，用示獎稱。真宗御製七言十韻詩一首賜之。早自外朝登近侍，克符昌運振嘉名。一參黃閣推良畫，再陟鴻樞顯至榮。該博古今常納獻，勤勞夙夜每專

精石渠撰述多文備日觀封崇大禮成宰輔調元心匪懈真官兼職望彌清龍樓進秩恩尤異熊軾爲藩任不輕二浙奧區期惠化三吳佳致悅高情重重山水舟中見處處壺漿陌上迎旣肅邇遐安外域更分宵旰撫黎氓予衷側席方毗倚佇看甘棠播頌聲仍命依韻和進

舊刻石於天慶觀

天禧四年八月甲申召

知相州

王隨

天禧四年九月己酉朔以右諫議大夫兼太子右庶子權知開封府王隨爲給事中知杭州乾興元年二月戊辰授祕書少監知通州

李及

乾興元年三月壬申以樞密直學士給事中李及知杭州天聖元年九月丁亥徙知應天府兼南京留守司本傳字知幾資性清介所治尙簡嚴善慰薦下吏而樂道人之善在杭州惡其風俗輕靡未嘗事燕遊一日微雪遽出郊衆謂當命賓朋爲高會乃獨造處士林逋清談至暮而歸任中不市物及去惟

買白樂天集一部

天聖六年卒謚恭惠

周起

天聖元年九月丁亥徙知揚州秘書監周起知杭州

馬亮再除

天聖四年三月庚辰徙知亳州工部尚書集賢院學士馬亮知杭州未行復知亳州是年四月戊午徙周起知應天府兼南京留守司

胡則

天聖四年戊午徙太常少卿知福州胡則爲諫議大夫知杭州

李諮

天聖六年正月戊午以右諫議大夫知洪州李諮爲給事中知杭州七年十月丙戌徙知永興軍

朱巽

天聖七年以左諫議大夫給事中新知河中府朱巽知杭州八年四月甲申爲集賢院學士五月乙丑徙知揚州本傳字順之揚州天長人忠愿自守真宗稱爲長者

陳從易

天聖八年五月癸丑以左諫議大夫知制誥陳從易爲龍圖閣直學士知杭州從易本傳字簡夫泉州人九年正月卒於官

張觀。

天聖九年二月己丑，以右司諫知制誥張觀爲尙書兵部員外郎，知杭州。觀本傳，字思正，絳州人。真宗朝，以服勤辭學科擢爲第一。初名正觀，至是御筆去上一字。知杭州，再遷刑部郎中，代還，判國子監。

累除

同知樞密院事。

拜尙書左丞。

胡則，再除。

明道二年四月甲子，徙知陳州尙書刑部侍郎胡則知杭州。景祐元年四月甲辰，除兵部侍郎致仕。則本傳，字子正，婺州永康人，少有清名，尙風義。真宗、仁宗擢用焉。

鄭向。

景祐元年四月丙午，以尙書兵部郎中知制誥鄭向爲龍圖閣直學士，知杭州。三年四月庚午，杭州言向卒。本傳，字公明，開封陳留人。

俞獻卿。

景祐三年四月辛未，以右諫議大夫俞獻卿爲集賢院學士，知杭州。四年十二月庚午，爲給事中。本傳，字諫臣，歙州人。真宗朝，嘗爲杭州仁和令，暨知杭州。一日暴風，江潮溢決堤，勢不可禦。獻卿鑿西山石

作堤數十里。民用便之。賜詔褒諭。

柳植。

寶元元年六月癸未。徙知蘇州尚書工部侍郎。知制誥柳植。知杭州。二年八月辛未。以植爲翰林學士。司馬池。

寶元二年八月丁丑。徙知同州尚書工部郎中。天章閣待制司馬池。爲兵部郎中。知杭州。康定元年九月辛酉。移知饒州。

張若谷。

康定元年九月辛酉。以知應天府樞密直學士尚書刑部侍郎張若谷。爲龍圖閣直學士。知杭州。慶歷元年五月壬申。徙知鄭州。

鄭戩。

慶歷元年五月辛未。以樞密副使右諫議大夫鄭戩。爲資政殿學士。知杭州。二年六月癸未。除給事中。知并州。戩本傳。字天休。蘇州人。性強毅明俊。意有所欲。必行之。西湖溉民田數百頃。歲久不治。葑泥湮塞。久爲豪族與僧寺規占甚多。戩乃發屬縣丁數萬。盡闢之。民賴其利。後有詔。歲常修導。

蔣堂。再除。

慶歷二年六月甲午，以尙書戶部郎中天章閣待制知應天府蔣堂爲左司郎中，知杭州。三年六月丁巳，除樞密直學士，知益州。堂本傳，字希魯，宜興人。始知杭州，徙益州，移河中府，再知杭州。

宋祁

慶歷三年七月丁卯，以尙書禮部郎中知制誥宋祁爲龍圖閣直學士，知杭州。本傳云：未行，改翰林學士，知審刑院。

楊偕

慶歷三年九月壬辰，以知越州翰林侍讀學士尙書左司郎中楊偕知杭州。偕本傳，字次公，性剛樸，敢爲大言。慶歷三年知審官院，求知越州，道改杭州。上太平可致十象圖，還判太常寺。

方偕

慶歷五年十月戊寅，徙淮南江浙荆湖制置發運使尙書兵部員外郎天章閣待制方偕知杭州。六年六月甲戌，轉刑部郎中。七年七月庚子，除太常少卿，分司西京。本傳，字齊古，莆田人。本以吏事進，而杭訟牒素煩，遣決無留事，以病故分司。

范仲淹

皇祐元年正月乙卯，以知鄧州資政殿學士給事中禮部侍郎范仲淹知杭州。七月癸卯，加尙書禮部

侍郎。二年十月戊辰，加戶部侍郎。十一月辛酉，徙京東東路安撫使，知青州。本傳字希文，自樞密副使除參知政事，以疾請知鄧州，徙杭州。內剛外和，所至有恩。里巷之人皆知其名字。正。謚文。

張方平。

皇祐二年十一月辛酉，以知江寧府端明殿學士兼龍圖閣學士給事中張方平知杭州。本傳字安道，宋城人。慷慨有節氣，知杭州言畿內稅賦之重，及請減定刺配刑名，由是畿縣稅損元額十三。刺配法亦稍裁之，遷禮部侍郎，知滑州。累遷參知政事。謚文定。

呂澂。

皇祐三年六月甲午，以起居舍人呂澂知杭州。本傳字濟叔，揚州人。舉進士第一，累遷知制誥，知杭州。爲人簡倨，接賓客不過數言，時人目爲七字舍人。然開敏善議論，一時名公多推許之。自杭州除糾察在京刑獄，勾當三班院。

孫沔。

皇祐五年四月壬子，以樞密直學士給事中孫沔知杭州。行至南京，召爲樞密副使。本傳字元規，會稽人。明敏果敢，有吏材，所在皆著能迹。其知杭州，仁宗解御帶賜之。

李兌。

皇祐五年八月己未，以尚書吏部員外郎天章閣待制知諫院李兌爲戶部郎中，知杭州。本傳字子西，許州人。知杭州日，仁宗飛白書安民字以賜之，介靜簡嚴，年老而精明，有所舉措，要使民便安之。

孫沔再除

至和元年二月壬戌，以樞密副使給事中孫沔爲資政殿學士，知杭州。嘉祐元年八月戊午，加資政殿大學士，京東東路安撫使，知青州。

何中立。

嘉祐元年八月壬戌，徙知陳州樞密直學士尚書刑部郎中何中立知杭州。二年八月癸酉，杭州言中立卒。本傳字公南，許州人，頗工文詞。

梅摯。

嘉祐二年九月戊寅，以龍圖閣直學士尚書吏部郎中梅摯知杭州。三年六月丙辰，徙知江寧府。本傳云，字公儀，成都府人，性淳靜，不爲矯厲之行，所治如其爲人，雅好詩，時有警句。其知杭州，仁宗賜詩寵行，地有湖山美，東南第一州，剖符宣政化，持橐輟才流，暫出論思列，遙分肝爪憂，循良勤撫俗，來暮聽歡謳，摯以詩之首章名堂爲有美，命歐陽修撰記，刻石堂上。

唐詢，鄉郡

嘉祐三年六月丙辰，以知蘇州尚書禮部郎中知制誥唐詢知杭州。五年九月甲辰，除禮部郎中。本傳。

字彥猷，杭州錢塘人。餘具人物門。

施昌言。

嘉祐五年九月甲辰，以知鄧州樞密直學士給事中施昌言爲尚書刑部侍郎，知杭州。七年八月甲申，除龍圖閣直學士，涇原路經略安撫使。本傳。字正臣，通州靜海人。

沈遼，地郡

嘉祐七年八月甲申，以起居舍人知制誥沈遼爲尚書禮部郎中，知杭州。本傳。字文通，杭州人。自越州徙知杭州，遷吏部郎中，召爲勾當三班院，爲人輕儻明敏，通達世務。其治杭，令行禁止，人有貧不能葬及女子孤無以嫁者，以公使錢葬嫁數百人，倡優養良家女爲己子者，奪歸其父母。接遇士大夫，多得其歡心。所部吏尤樂傾盡爲之耳目，刺閭巷間事，纖悉卽知。故事至立斷，衆莫不駭伏。小民有犯，情稍不善，不問法輕重，斷訖強刺爲卒，刺者數百人，人屏息不敢犯。議者以其嚴比孫沔，然沔苛暴，銳於懲惡，至遼，善人亦懼焉。晨起治事，及午事畢，出與賓舊往還，從容談笑，以示有餘。士大夫稱其能。

王琪。

治平元年九月甲戌，以樞密直學士同判太常寺王琪知杭州。十一月己亥，轉右諫議大夫。二年徙知揚州。本傳字君玉，成都人，以詩知名於世。

蔡襄。

治平二年二月，以三司使給事中蔡襄爲端明殿學士，尙書禮部侍郎，知杭州。本傳字君謨，興化軍仙游人，爲政精明，吏不能欺。三年五月甲寅，徙知應天府。

胡宿。

治平三年四月庚戌，以樞密副使尙書禮部侍郎胡宿爲尙書吏部侍郎，觀文殿學士，知杭州。四年六月甲子，以太子少師致仕。本傳字武平，常州晉陵人，清儉謹默，內剛外和，其蒞官治事，今上御名重不輒發。

發亦不可回。臨民篤恭，不略細故，人尤愛之。神宗卽位，遷左丞，以疾卒於杭州。學問文章，人多稱述之。

謚曰

文恭。

呂溱，再除。

治平四年六月甲戌，以給事中集賢院學士呂溱爲龍圖閣直學士，再知杭州。九月辛丑，除知開封府。

祖無擇。

治平四年十月丁未。以右司郎中知鄭州祖無擇。爲右諫議大夫。加龍圖閣學士。知杭州。

鄭獬。

熙寧二年五月癸未。以翰林學士尙書兵部員外郎鄭獬。爲翰林侍讀學士。戶部郎中。知杭州。三年四月己卯。徙知青州。本傳。字毅夫。安州人。舉進士第一。

郎抃。

熙寧三年四月己卯。以右諫議大夫參知政事趙抃。爲資政殿學士。知杭州。十二月庚申。徙知青州。本傳。字閱道。衢州西安人。和易長厚。氣貌清逸。所至必興學校。勸獎後進。爲政視其俗之厚薄與事多寡。設施爲術不同。杭州故多盜。聞抃性寬。細民益聚。爲盜。抃取其情重者配他州。盜遂散去。境內以清。

沈立。

熙寧三年十二月庚申。以知越州右諫議大夫沈立。知杭州。本傳。字立之。和州人。知越州。移杭州。除審官西院。勤於職事。所得圭租。多以市書。

陳襄。

熙寧五年五月乙未。以知陳州尙書刑部郎中知制誥陳襄。知杭州。熙寧七年六月己巳。徙知應天府。

本傳。字述古。福州人。有學行。所至務先學校。至親爲講解。好荐達人才。喜愠不形於色。爲政多慕古人所爲。

楊繪。

熙寧七年六月己巳。以知應天府翰林侍讀學士尙書禮部侍郎楊繪知杭州。與陳襄兩易其任。本傳。字元素。漢

州人。爲翰林學士。御史中丞。出知應天府。徙杭州。再入爲翰林學士兼侍讀。

沈起。

熙寧七年九月丙申。徙知潭州尙書刑部郎中天章閣待制沈起知杭州。本傳。字興宗。明州人。爲人寬和。臨事明敏。

蘇頌。

熙寧九年正月丙寅。以秘書監集賢院學士蘇頌知杭州。本傳。字子容。時以吳越薦飢。自勾當三班院選知杭州。召爲提舉中太一宮。修仁宗英宗正史。

章惇。

熙寧十年五月庚申。以知湖州右正言知制誥章惇知杭州。未行。爲翰林學士。

趙抃再除。

熙寧十年五月癸亥以知越州資政殿大學士右諫議大夫趙抃知杭州十月戊子抃言吳越國王錢氏有墳廟在錢塘臨安縣棟宇頽圯林木荒穢欲令兩縣選僧道主管歲度其徒各一人從之朝旨欲修杭州城抃度出於人者數千萬獨奏杭人新罹旱災未可興工乃罷役抃告老元豐二年以舊職加

太子太保致仕。

自號知非子謚清獻。

鄧潤甫。

元豐二年正月己丑以右諫議大夫知撫州鄧潤甫知杭州四年四月乙酉除龍圖閣直學士徙知成

都府本傳字聖求建昌人。累遷尚書左丞謚安惠。

張詵。

元豐二年四月乙酉以龍圖閣直學士知成都府張詵知杭州本傳字樞言浦城人既除知杭州未行詔權知熙州經略熙河事既而赴杭州哲宗卽位遷正議大夫請解郡事除提舉杭州洞霄宮。

呂公孺。

元豐八年四月丁丑以正議大夫呂公孺知杭州未行五月丙辰除龍圖閣直學士知鄆州本傳字稚

卿故相夷簡之子。初知陳州。徙杭州。再知郟州。

蒲宗孟。

元豐八年七月庚戌。以新知揚州太中大夫資政殿學士蒲宗孟知杭州。元祐二年十一月己酉。徙知

郟州。本傳。字傳正。閬州人。

集錢塘詩。自宋齊以來。至元豐間。凡三千餘篇。爲三十卷。行於世。

楊繪。再除。

元祐二年十一月庚申。以知徐州朝散大夫天章閣待制楊繪知杭州。本傳。神宗朝。知杭州。入爲翰林

學士兼侍讀。英宗卽位。再知杭州。元祐三年六月。杭州言繪卒。繪吏事敏給。主於愛利。雖胥吏阜隸有

過。多容之。

熊本。

元祐三年六月癸巳。以龍圖閣待制知越州熊本知杭州。四年五月庚午。徙知江寧府。

蘇軾。

元祐四年三月丁亥。以翰林學士蘇軾爲龍圖閣學士。知杭州。六年正月丙戌。除吏部尙書。本傳。字子

瞻。眉州人。熙寧四年。通判杭州。後十六年。復爲郡守。歲適水潦。飢疫相仍。軾爲請於朝。得減上供米三

之一。故穀不翔踊。復以所賜度牒。益市粟濟飢殍。明年賤糶常平米。又作糜粥遺人。命醫官分治疾病。賴以全活者甚衆。開西湖。疏茆山鹽橋河。修治堰閘。濬城中六井。與民興利除害。講究甚悉。郡人德之。爲立祠堂。六年。召爲翰林學士承旨。

熊本。再除。

元祐六年正月丙戌。以龍圖閣待制知江寧府熊本知杭州。本傳。字伯通。鄱陽人。初除越州。道移杭州。徙江寧府。遷中大夫。復除杭州。未行。召還。

林希。

元祐六年二月癸巳。以朝奉大夫天章閣待制知潤州林希知杭州。是年三月癸酉。詔遷一官。七年十

月丁丑。除禮部侍郎。

累遷同知樞密院事。

王存。

元祐七年八月癸亥。以吏部尚書知大名府王存知杭州。紹聖元年八月丁丑。提舉江寧府崇禧觀。

陳軒。

紹聖元年八月乙酉。以知廬州龍圖閣待制陳軒知杭州。三年八月辛巳。徙知江寧府。本傳。字元與。建

州建陽人。嘉祐八年舉進士第二。

韓宗道。

紹聖三年八月辛巳。以知瀛州大中大夫寶文閣待制韓宗道知杭州。元符元年七月丁卯。除工部侍郎。本傳字持正。真定人。後以疾請。詔以舊職加通議大夫致仕。命未下。四年卒。

李琮。

紹聖四年七月戊辰。以刑部侍郎李琮爲寶文閣待制。知杭州。元符元年八月丙子。徙知永興軍。

虞策。鄉郡。

元符元年八月丙子。以龍圖閣待制新知永興軍虞策知杭州。未行。九月己酉。除戶部侍郎。

林希。再除。

元符元年九月己酉。以中大夫知亳州林希知杭州。

豐稷。

元符二年□月□□。以龍圖閣待制豐稷知杭州。三年四月己酉。除諫議大夫。

呂惠卿。

元符三年四月己酉。以檢校司徒、鎮南軍節度使、知延安府呂惠卿知杭州。建中靖國元年三月癸亥。

爲觀文殿學士右銀青光祿大夫提舉杭州洞霄宮。

龔原。

建中靖國元年三月癸亥以承議郎知壽州龔原爲寶文閣待制知杭州。是月戊子爲集賢院修撰。知揚州。

陳軒再除。

建中靖國元年三月戊子以龍圖閣直學士新知揚州陳軒知杭州。崇寧元年四月癸卯徙知福州。鄒浩。

崇寧元年四月癸卯以寶文閣待制知江寧府鄒浩知杭州。五月己卯移知越州。

呂惠卿再除。

崇寧元年閏六月己未以右銀青光祿大夫提舉杭州洞霄宮呂惠卿爲觀文殿學士知杭州。八月移知揚州。

蔣之奇。

崇寧元年十月癸亥以知樞密院事蔣之奇爲觀文殿學士知杭州。

字文昌齡。

崇寧二年九月乙巳，以寶文閣待制知越州宇文昌齡知杭州。四月以中大夫致仕。
王寧。

崇寧四年六月戊子，以尙書吏部侍郎王寧爲顯謨閣待制，知杭州。七月丙申，改知海州。
曾孝廣。

崇寧四年七月丁巳，以戶部尙書曾孝廣爲天章閣待制，知杭州。十一月丙午，徙知秦州。
呂惠卿。三除。

崇寧五年八月癸酉，以觀文殿學士知青州呂惠卿知杭州。
曾孝蘊。

大觀元年四月辛未，以顯謨閣待制、淮南江浙荆湖等路發運使曾孝蘊知杭州。既而改知濠州。
朱彥。

大觀元年五月戊申，以顯謨閣待制新知洪州朱彥知杭州。四年正月庚申，徙知潁昌府。
王渙之。

大觀二年三月辛酉，以顯謨閣待制知潭州王渙之知杭州。
席震。

大觀三年二月壬午，以徽猷閣待制知潭州席震知杭州。是年五月丁卯，改知廣州。壬申，復知杭州。

蔡蕤。大觀三年七月丁未，以奉議郎知和州蔡蕤爲顯謨閣待制。知杭州。十月甲戌，除給事中。

張商英。大觀三年十二月癸酉，以通議大夫提舉成都府玉局觀張商英爲龍圖閣直學士。知杭州。乘驛赴闕。四年二月辛未，除資政殿學士中太一宮使。

劉達。大觀四年二月壬辰，以中大夫提舉亳州明道宮劉達知杭州。本傳字公達，隨州隨縣人。元豐八年舉進士第三。四年六月庚午，除資政殿學士。癸未，詔乘驛赴闕。

張閣。大觀四年九月壬申，以翰林學士張閣爲龍圖閣學士。知杭州。本傳字臺卿，河陽人。杭久闕守，郡事廢弛。閣經理有敝，首去惡少之爲民害者，郡人爲立生祠。召爲兵部侍郎。

龐寅孫。政和元年九月辛酉，以司農卿龐寅孫爲顯謨閣待制。知杭州。三年六月丙子，除徽猷閣直學士。

董正封。

政和四年八月甲子，以中大夫集賢殿修撰董正封爲徽猷閣待制，知杭州。

李偃。

政和五年八月甲辰，以起復集賢院修撰李偃爲徽猷閣待制，知杭州。十二月癸亥，徙爲河南尹。偃嘗奏湯村岩門白石等處，並邊錢塘江通大海，日受兩潮，漸致侵嚼，乞依六和寺岸，用石砌壘，詔令轉運使劉旣濟措置。

趙燾。

政和六年閏九月戊辰，以中奉大夫右文殿修撰京畿轉運使趙燾爲徽猷閣待制，知杭州。宣和元年八月丙戌，移知潭州。

趙燾。

宣和元年八月丙戌，以徽猷閣待制江淮荆浙等路發運使趙燾知杭州。二年十二月丁亥，徙知青州。曾孝蘊，再除。

宣和二年十二月丁亥，以朝請大夫天章閣待制新知睦州曾孝蘊知杭州。

虞奕，鄉郡。

宣和三年正月辛酉，以起復龍圖閣直學士新知杭州虞奕知鎮江府。是年四月丁酉，以知杭州曾孝
蘊爲顯謨閣直學士。

蔡疑，再除。

宣和三年十月丁未，以通議大夫提舉嵩山崇福宮蔡疑知杭州。四年十一月癸巳，詔龍圖閣直學士
知杭州蔡疑提舉南京鴻慶宮。

翁彥國。

宣和四年十二月甲午，以朝散大夫徽猷閣直學士知江寧府翁彥國知杭州。七年十一月辛巳，除提
舉南京鴻慶宮。

唐恪。

宣和七年十一月辛巳，以延康殿學士正議大夫知潭州唐恪知杭州。靖康元年正月己巳，除吏部尚
書。

翁彥國。

靖康元年正月己巳，以朝散大夫徽猷閣直學士翁彥國知杭州。是月乙未，改知鎮江府。
毛友。

靖康元年正月甲辰，以朝散大夫延康殿學士毛友知杭州。是年十月乙巳，除宮祠。
葉夢得。

靖康元年十月乙卯，以朝散大夫葉夢得復龍圖閣待制，知杭州。

錢伯言。

建炎元年八月丁丑，以龍圖閣直學士錢伯言知杭州。

侍其傅。

建炎元年九月丁未，以朝議大夫直秘閣知真州侍其傅，特授集英殿修撰，知杭州。二年四月十四日。

徙知宣州。

康允之。

建炎二年七月庚戌，以徽猷閣待制康允之知杭州。三年八月罷。通判軍事安是年十一月三日改杭州

爲臨安府。

季陵。

建炎四年四月，以□□閣待制季陵知臨安府。

胡舜陟

建炎四年六月戊寅，以徽猷閣待制胡舜陟知臨安府。是年八月丁憂解官。

李光

建炎四年九月甲寅，以徽猷閣待制李光知臨安府。紹興元年正月三日，徙知洪州。

孫覲

紹興元年三月三日，朝奉郎提舉江州太平觀孫覲，除龍圖閣待制，知臨安府。

紹興題名記

安撫敷文湯公帥臨安之明年，暇日謂其屬吏何溥曰：臨安爲東南一都會，登郡而府，有年於茲，異時名公鉅儒，旌槩相望，流風美政，播在人口。至今故老能言之，矧惟皇帝時巡，警蹕所在，呼吸四方，根柢萬寓，其事勢增重，實視古京兆。自始幸距今，凡二十年，帥臣代易，僅以十數。至問其姓名，輒不可盡得。閒訪而得之，往往不能以次對，豈非題名不立之故哉？予將編列其人，勒之堅石，以植於府治之東偏。庶幾來者有攷焉，子其爲我記之。溥既承命，退而考求其故，維臨安舊爲杭州，領浙西兵馬鈐轄，宣和間改安撫使，至建炎而陞爲府。未幾，鈐轄如舊，自紹興駐蹕以來，事任非曩比，故使名復立。至今凡爲帥十有六人，於是爲記。紹興十九年六月二十七日，府學教授兼權太學博士何溥記。

席益。

紹興元年十一月二十六日，朝奉郎起居舍人席益，除集英殿修撰，知臨安府。二年正月十八日，徙知衢州。

宋輝。

紹興二年正月十六日，朝議大夫直龍圖閣發運副使宋輝，除秘閣修撰，知臨安府。三年二月二十五日，除宮祠。

盧知原。

紹興三年三月初五日，以右中奉大夫徽猷閣待制都督府參謀官盧知原，知臨安府。是年六月二十七日，除宮祠。

梁汝嘉。

紹興三年七月初三日，右朝請郎直秘閣兩浙轉運副使梁汝嘉，除龍圖閣，知臨安府。六年八月初五日，除戶部侍郎。

李謨。

紹興六年八月二十九日，以左中奉大夫直寶文閣知鎮江府李謨，知臨安府。七年正月初八日，復知

鎮江府

呂頤浩

紹興七年二月二十七日，鎮南軍節度使知潭州呂頤浩除少保，知臨安府。八年正月初八日，召赴行在。

張澄

紹興八年二月二十九日，以右朝請大夫集英殿修撰知建康府張澄知臨安府。十年六月初一日，除戶部侍郎。

蔣燦

紹興十年六月初一日，以右中奉大夫直龍圖閣兩浙轉運副使蔣燦知臨安府。是年八月二十二日，復爲兩浙轉運副使。

張匯

紹興十年八月二十四日，以右朝散大夫直秘閣兩浙轉運副使張匯知臨安府。是年九月二十一日，復爲兩浙轉運副使。

俞俟

紹興十年九月二十六日，右朝請大夫直秘閣知揚州俞俟，除秘閣修撰，知臨安府。十二年十一月初四日，除敷文閣直學士，提舉江州太平觀。

王曠。

紹興十二年十一月初四日，右中大夫集英殿修撰兩浙轉運副使王曠，除敷文閣待制，知臨安府。十三年八月初八日，除工部侍郎。

張叔獻。

紹興十三年八月初八日，以右朝奉郎直龍圖閣兩浙轉運副使張叔獻，知臨安府。十四年十一月初三日，改知紹興府。

張澄，再除。

紹興十四年十一月初三日，以龍圖閣學士右宣奉大夫知紹興府張澄，知臨安府。十六年九月十八日，除慶遠軍節度使，改知溫州。

沈該。

紹興十六年十月初五日，以左朝散大夫直秘閣兩浙轉運判官沈該，知臨安府。十七年八月十四日，除權禮部侍郎。

趙不奔。

紹興十七年八月十四日，右中奉大夫權工部侍郎趙大奔，除敷文閣待制，知臨安府。十八年六月十九日，除工部侍郎。

湯鵬舉。

紹興十八年六月十九日，左中奉大夫直秘閣兩浙轉運判官湯鵬舉，除直敷文閣，知臨安府。十九年八月十七日，除司農卿。

宋賧。

紹興十九年八月二十三日，以右通奉大夫權尚書戶部侍郎宋賧，兼權知臨安府。二十一年閏四月十二日，轉正奉大夫，罷。

趙士彰。

紹興二十一年閏四月十三日，以左朝請大夫兩浙轉運判官趙士彰，兼權知臨安府。是年九月十三日，除直秘閣。十九日，正除知府。二十三年九月二十三日，除直敷文閣，改知紹興府。

曹泳。

紹興二十三年九月二十三日，右朝請大夫直徽猷閣知紹興府曹泳，除直顯謨閣，知臨安府。十月初

三日到任。二十四年十一月十七日兼權戶部侍郎。二十五年十月二十三日罷。

韓仲通。

紹興二十五年十月二十四日。以右通奉大夫權刑部尚書兼權詳定一司勅令韓仲通。兼權知臨安府。二十六年三月十七日。除戶部尚書依舊兼府事。

榮蕤。

紹興二十六年九月八日。右朝請大夫知常州榮蕤。除直秘閣。知臨安府。二十七年二月十一日。以職事修舉。轉右朝議大夫。繼以磨勘。轉右中奉大夫。七月十一日。除權戶部侍郎。

張僞。

紹興二十七年七月十一日。以右朝議大夫直秘閣兩浙轉運判官張僞。知臨安府。是年十二月。除直敷文閣。二十八年九月。轉右中奉大夫。十一月。除直顯謨閣。二十九年閏六月初九日。除秘閣修撰。知

明州。

趙子瀟。

紹興二十九年閏六月初九日。左朝請大夫直秘閣權發遣兩浙路計度轉運副使趙子瀟。除直敷文閣。權發遣臨安府。三十年二月十五日。除戶部侍郎。

錢端禮

紹興三十年二月十五日，右中大夫充秘閣修撰兩浙路計度轉運副使錢端禮，除右文殿修撰，知臨安府。是年七月十一日，除戶部侍郎。

黃仁榮

紹興三十年七月十一日，右中奉大夫直秘閣兩浙路計度轉運副使黃仁榮，除直敷文閣，知臨安府。是年九月初三日，丁母憂。

錢端禮

紹興三十年九月初四日，以右中奉大夫權尚書戶部侍郎錢端禮，兼權知臨安府。三十一年正月十九日罷。

趙子瀟

再除

紹興三十一年正月十九日，左朝議大夫權尚書戶部侍郎趙子瀟，除敷文閣待制，知臨安府。三十二年九月十七日，除尚書戶部侍郎，仍兼知府事。隆興元年正月十八日罷。

林安宅

隆興元年正月十八日，左朝請大夫尚書左司郎中林安宅，除直顯謨閣，知臨安府。是年五月二十九

日除主管台州崇道觀。

陳輝

隆興元年六月二日以右朝議大夫直秘閣兩浙轉運副使陳輝兼權知臨安府是年七月三日除直

敷文閣知府事二年四月四日改知建寧府

避家諱自陳改知湖州

黃仁榮再除

隆興二年四月初八日以右中奉大夫直敷文閣兩浙轉運副使黃仁榮知臨安府是年十一月二十

六日罷

吳芾

隆興二年十一月二十六日左朝議大夫試尚書吏部侍郎吳芾除敷文閣直學士知臨安府是年十

二月初五日復爲吏部侍郎

薛良朋

隆興二年十二月初五日以左朝奉大夫直顯謨閣兩浙轉運副使薛良朋知臨安府乾道元年七月十八日以警戢盜賊究心職事除直龍圖閣二年五月十一日除權工部侍郎

王炎。

乾道二年五月十一日，右朝奉大夫兩浙轉運副使王炎，除直敷文閣，知臨安府。十二月十三日，以職事修舉，除授秘閣修撰。三年五月二十六日，除敷文閣待制，知荆南府。

周淙，再除。

乾道三年五月二十六日，以右朝奉大夫直龍圖閣兩浙轉運副使周淙，知臨安府。

先是紹興二十五年嘗通判府事。

至

乾道五年二月十五日，以職事修舉，除秘閣修撰。乾道四年十一月十四日，磨勘轉右朝議大夫。五年七月初四日，除右文殿修撰，再任。

道光間，錢塘汪氏振綺堂校刊宋本潛氏咸淳臨安志，讀黃氏士珣札記，知曾取乾道、淳祐二志參校，惜其不并刻二志，豈以其殘闕過甚，抑所載者已具咸淳志中耶？夫志乘當詳固矣，然考古者徵引事實，必以始出者爲據，二志雖殘，實爲咸淳志所採用，創始之功，不可沒也。會稽章碩卿大令得鈔本乾道志三卷於京師藏書家，爲故學師嘉興家警石先生校本，攜歸蜀中刻之，屬爲校勘。今審其確爲鈔本誤而校本是者，鈔本脫漏而校本完善者，悉從校本補正。有兩通者，錄其校語於札記中，標曰原校，保塘所校者，中以按字別之。潛志所載乾道志佚文數條，並爲補入。周志原文間有誤處，有可審其歧異之由者，並據他書詳加辨證，以備修郡志者決擇焉。原書每葉十八行，行二十字，遇宋帝詔旨等字均提行空格，稱孝宗爲今上，光宗以下諱均不避，蓋卽從書成後初刻本輾轉影鈔者也。光緒四年八月，海寧錢保塘識。

卷一 九宮壇歲祀九宮貴神 輿地紀勝一引作歲祀太一攝提權主招搖天爵青龍咸池太陰天乙等九宮貴神。按輿地紀勝成於嘉定中，所引臨安志諸條均與周志同，當卽周志之文，惟此條歷載九宮貴神之名，疑紀勝兼取臨安志他卷之文，鑿括成之，故較詳耳。餘所引與周志文同者不記。

晨華館 輿地紀勝一引作神華館。按潛志亦作晨華館，與此合，今從之。

左右金吾衙仗 原校衙作街。

卷二 因爲縣焉 原校一本作因立爲縣。

龍德三年 潛志作龍德二年。

淳化五年陞南新場爲昭德縣六年改爲南新縣 太平寰宇記南新縣本臨安縣地乾德五年錢氏割臨安縣地置南新場以便徵科太平興國六年改爲南新縣輿地紀勝嚴州分水縣寶應二年析置昭德縣大歷六年省昭德入分水潛志淳化六年置南新縣本嚴州分水縣東境唐寶應置爲昭德縣大歷併入分水縣梁正明四年以民戶之請隸安國縣乾德間卽其地置場催科名曰南新至是陞爲縣按此則昭德本唐縣宋因其名復立之耳元豐九域志淳化五年以南新場爲昭德縣六年改昭德爲南新縣此周志所本也然淳化止五年次年正月改元至道二志皆言淳化六年改南新縣恐承九域志之誤昭原誤作紹今更正。

唐景福二年 唐原誤作後周今據通鑑更正。

戶口 按潛志載乾道志云錢塘縣主客戶四萬六千五百二十一。口六萬八千九百五十一。仁和縣主客戶五萬七千五百四十八。口七萬六千八百五十七。餘杭縣主客戶一萬九千八百一十七。口二萬九千九百一十一。臨安縣主客戶二萬四千二百六十一。口四萬四千七百四十二。於潛縣主客戶二萬二千九百九十五。口四萬六千二百九十二。富陽縣主客戶一萬九千九百二十三。口三萬六千一十七。新城縣主客戶一萬二千四百八十三。口三萬六千五百五十一。鹽官縣主客戶五萬八百三十一。口五萬九千三百

四十四。昌化縣主客戶一萬一十三。口一

潛志黃氏札記云一
成化志作五是也。

萬四千三十三。此本佚之。今補入。惟九縣戶

數合計之。適合二十六萬一千六百九十二之數。口數合計止四十六萬五千九百五十九。較總數尙少八萬六千六百四十八。卽昌化縣口數依成化志作五萬。亦少四萬六千六百四十八。以鹽官戶口計之。口僅多六分之一。是一縣有五萬八百餘家。單丁也。其爲脫誤顯然。以此推之。諸縣口數。亦尙有誤處。

禁軍 威捷第一指揮以下八行。原頂格書。依前後體例當移低一格。潛志亦如此。今從之。

清河坊 河原誠和。今據潛志更正。注同。

延福坊 潛志作賢福坊。

壩東巷 壩原誤瀾。今據潛志更正。下同。

苦棟皮 潛志棟作練。

箬 原校一作箬。按箬竹名。見玉篇。廣韻。潛志作苦。

仁和館湯鵬舉重建 原校一本無重字。

遼 原校改作遼。按遼爲高宗嫌名。故書字不成。今從之。下同。

一時名流皆有詩。此下原有後人以爲酒名六字。原校引吳兔牀齋云。以爲酒名四字。疑後中和堂下注。誤重。按其說是也。今從之。並去後人二字。

斯堂偉特之觀。斯堂本作登斯。原校云。一本作斯堂。按潛志亦作斯堂。今從之。

虛白堂晏殊輿地志云爲刺史。爲刺史上疑脫宋璟二字。見輿地紀勝一引晏公類要。

卷三 宣祖廟諱下一字 本作上一字。接以大書亮字。按宣祖廟諱下一字爲殷。潛志有殷亮。卽其人也。今據更正。

李自挹 潛志作士挹。

相里尹造 潛志作相里君。引白居易冷泉亭記。有相里君造虛白亭。或云相里君名造。未有的據。不列於表。按白記語意。蓋不以造字爲名。此尹字當是君之誤。容齋五筆有相里造與魚朝恩辨論事。恐別是一人。

柳沖楊憑 潛志牧守表。列唐刺史。較周志增多二十二人。惟此二人。潛志無之。

周寶爲杭州刺史。後唐僖宗時羣盜起。寶募諸縣鄉兵討之。號八都兵。見五代史。按吳越備史、新唐書、通鑑。乾符六年。周寶以涇原節度使爲鎮海節度使。光啓三年。軍亂。爲部將薛朗所逐。奔常州。錢武肅王遣將杜稜拔常州。迎寶歸杭州。十二月。寶卒。未嘗爲杭州刺史也。五代史亦無寶募諸縣鄉兵討賊號八都兵之事。惟新唐書寶傳稱。僖宗時。羣盜所在盤結。寶練卒自守。發杭州兵戍縣鎮。判八都。此周志誤列寶爲杭州刺史之由也。唐制。節度使所治之州。卽兼其州刺史。是時鎮海軍節度使治潤州。兼領潤州刺

史而杭州爲其巡屬。寶至杭州時，武肅方爲杭州刺史，故屬囊鞬具部將禮迎之。武肅既克常潤，景福二年，授鎮海軍節度，潤州刺史。乾寧三年，平董昌於越州，兼領鎮東節鉞。次年賜鐵券，文結銜稱鎮海鎮東等軍節度，潤越等州刺史，以鎮東治越州故也。然是時常潤二州爲淮南所據。光化元年，因請移鎮海軍於杭州，自是中朝制冊至吳越，遂稱兼杭越等州大都督府長史，或杭越等州刺史。至五代不改。

見吳越備史及增訂

本。周志見寶爲鎮海節度，以爲當兼領杭州刺史，故列其名於牧守中。潛志郡守表亦有寶名，蓋沿周志之誤也。當去寶而列董昌。昌於中和元年八月據杭州，寶承制表昌爲杭州刺史。至光啓三年，命武肅平劉漢宏，徙鎮越州。昌卽表武肅爲杭州刺史，見吳越備史。五代史通鑑諸書，潛志牧守表補昌名是也。又按通鑑，中和元年八月，杭州刺史路審中將至官，行至嘉興，董昌自石鏡引兵入杭州，審中懼而還。昌自稱杭州都押牙知州事，遣將吏請於周寶，寶不能制，表爲杭州刺史。周志是卷列牧守之名，凡已除而未行者亦列之，則亦當補路審中名。

邕州觀察使劉知信

潛志作亳州

張詠爲工部郎中

原校一本作侍郎，按潛志作侍郎

馬亮執役水中

原脫水字，今據潛志補

孫沔皇祐五年四月壬午 原作壬子。按是月爲庚午朔，不得有壬子。潛志作壬午，是也。今據更正。

唐詢除吏部郎中 原校一本作禮部。按潛志亦作吏部。

張詵元豐四年 原作二年。潛志作四年。按上稱鄧潤甫元豐二年知杭州，四年四月徙知成都，則二當作四。今據更正。

呂公孺 原校呂公孺至熊本初除。舊鈔本缺。今據海昌吳氏蔣氏藏本補。

陳軒龍圖閣待制 制原誤作詔。今據潛志更正。

豐稷元符二年 原脫二字。今據潛志補。

王渙之 潛志作煥之。

趙霽 原校一本作趙霆。按潛志亦作霆。

徽猷閣待制季陵 原脫徽猷二字。今據潛志補。

孫覲紹興元年正月三日 原作三月三日。按潛志是年正月三日。李光徙知洪州。繼之以是日孫覲知。則作正是也。今據更正。

宋輝紹興二年正月十八日 原作十六日。按上文席益以是年正月十八日徙知衢州。則六當作八。潛志亦承上文云是日。云云。今據更正。

蔣燦 原校一本作蔣璨。按潛志亦作璨。

趙士黻 原校一本作彰。一本作彰。按潛志亦作彰。

錢端禮再除以右中奉大夫知。潛志作太中大夫。

周滂再除以右朝奉大夫知。潛志右朝請大夫。按是節敍滂於乾道五年二月除秘閣修撰。繼之以乾道四年十一月轉右朝議大夫。又繼之以五年七月除右文殿修撰再任。滂自敍其官不應錯互其年之先後。非後人有所攙入。卽傳鈔有誤也。潛志稱滂於乾道三年五月二十六日知。四年十一月十四日轉右諫議大夫。五年二月十五日以職事修舉。除秘閣修撰。七月初四日除右文殿修撰再任。敍次先後不誤。

錢蘇 字臣甫。

一作臣仲

以孝義知名。居於錢塘門外九里松之間。嘗建傑閣。藏書甚富。蘇軾榜曰錢氏書藏。仕

至直秘閣。知荆南府。墳墓在靈隱、天竺兩山之間。謝景初字師厚。慶歷六年甲科及第。直講梅堯臣作詩美之。以大理評事知越州餘姚縣。作海塘防水患。民賴以安業。王安石嘗記其事。累遷益州提點刑獄。以屯田郎致仕。性剛勁峭。博學能文。尤長於詩。子堦。庭堅以詩名家。庭堅自謂從謝公得句法。俞舉善。錢塘人。累世同居。號義門。明道二年旌表門閭。按潛志云。輒給公。乾道志入姓氏。朱昇沈括入人

物。沈街作沈衍。以晉孫拯係吳。又。人物列傳於錢暄、錢彥遠、錢明逸、錢勰、薛溫、元德昭、元奉宗、元絳、盛度、謝濤、楊蟠、強至、周邠、虞奕、吳師禮、崔貢、孝婦盛氏諸傳下。皆云以他書及乾道志修。惟錢勰、謝景初、俞舉善傳祇云以乾道志修。則三傳爲此志原文也。因補錄於此。

編主五雲王

編初成集書叢

志安臨道乾

記札附

中華民國二十六年十二月初版

撰者 周 淙

校記者 錢 保 塘

發行人 王 雲 五
長沙南正路

印刷所 商 務 印 書 館
長沙南正路

發行所 商 務 印 書 館
各埠

鎮

